

釋迦譜卷第七

壁七

蕭 齊 釋 僧 祐 撰

釋迦子羅云出家緣記第十三 出未曾有經

爾時世尊告目犍連汝今往彼迦毗羅城問

訊我父闍頭檀王并我姨母波闍波提及三

叔父斛飯王等因復慰喻羅睺羅母耶輸陀

羅令割恩愛放羅睺羅令作沙彌修習聖道

所以者何母子恩愛歡樂須臾死墮地獄母

之與子各不相知窈窈冥冥永相離別受苦

萬端後悔無及羅睺得道當還度母永絕生

老病死根本得至羅漢如我今也目連受命

屈伸臂頃到迦毗羅淨飯王所而白王言世

尊慈懃致問無量起居輕利氣力安不及太

夫人波闍波提并三叔父斛飯王等問訊起

居亦復如是時耶輸陀羅聞佛遣使來至王

所未知意趣即遣青衣令參消息青衣還白

世尊遣使取羅睺羅度為沙彌耶輸陀羅聞

是消息將羅睺羅登上高樓約勅監官闔閉

門閤悉令堅牢時大目連既到官門不能得

入又無人通即以神力飛上高樓至耶輸陀

羅座前而立耶輸陀羅見目連來憂喜交集

迫不得已即起禮拜勅為敷座請目連坐問

目連曰世尊無恙教化衆生不勞神也遣上

人來欲何所為目連白曰太子羅睺年已九

歲應令出家修學聖道所以者何母子恩愛

少時如意一旦命終墮三惡道恩愛離別窈

窈冥冥母不知子子不知母羅睺得道當還

度母永度生老病死憂患得至涅槃如佛今

也耶輸陀羅答目連曰釋迦如來為太子時

娶我為妻奉事太子如事天神曾無一失共

為夫婦未滿三年捨五欲樂騰越宮城逃至
王田王身往迎違戾不從返遣車匿白馬令
還自要道成誓願當歸被鹿皮衣譬如狂人
隱居山澤勤苦六年得佛還國都不見親忽
忘恩舊劇於路人使我母子守孤抱窮今復

壁七

二

遣使欲求我子為其眷屬何酷如之太子成
道自言慈悲慈悲之道應安樂衆生今反離
別人之母子苦中之甚莫若恩愛離別之苦
以是推之今別人母子何慈之有白目連曰
還向世尊宣我所陳時大目連更以方便種
種諫喻曉耶輸陀羅而耶輸陀羅絕無聽意
辭退還到淨飯王所具宣上事王聞是已即
告夫人波闍波提我子悉達遣目連來迎取
羅云欲令入道修學聖法耶輸陀羅女人愚
癡未解法要心堅意固纏著恩愛情無縱捨

卿可往彼重陳諫之令其心悟時太夫人即
便將從五百青衣至其宮中隨宜諫喻反覆
再三耶輸陀羅猶故不聽白夫人曰我在家
時八國諸王競來見求父母不許所以者何
釋迦太子才藝過人是故父母以我配之太
子爾時知不住世出家學道何故慙懃苦求
我耶夫人取婦正為恩好聚集歡樂萬世相
承子孫相續紹繼宗嗣世之正禮太子既去
復求羅睺欲令出家永絕國嗣有何義哉爾
時夫人聞是語已默然無言不知所云爾時
壁七
世尊即起化人空中告言耶輸陀羅汝頗憶
三
念往古世時誓願事不我當爾時為菩薩道
以五百金錢從汝買得五莖蓮華上定光佛
時汝求我世所生共為夫妻我不欲受即
語汝言我為菩薩累劫行願一切布施不逆

人意汝能爾者聽為我妻汝立誓言世所
生國城妻子及與我身隨君施與誓無悔心
而今何故愛惜羅睺不令出家學聖道也耶
輸陀羅聞是語已霍然還識宿業因緣事事
明了如昨所見愛子之情自然消歇遣喚目
連懺悔辭謝捉羅睺手付囑目連與子離別
涕淚交流爾時羅睺見母愁苦長跪合掌前
白母言願母莫愁羅睺今往定省世尊尋爾
當還與母相見時淨飯王為欲安慰耶輸陀
羅令其喜故即集國中豪族而告之言金輪
王子今當往彼舍婆提國從佛出家學道願
卿人人各遣一子隨從我孫咸皆奉命即時
合集有五十人隨從羅睺往到佛所頭面作
禮佛使阿難剃羅睺頭及其五十諸公王子
悉令出家命舍利弗為其和尚大目犍連作

阿闍黎授十戒法便為沙彌爾時佛子羅云
等五十沙彌聞佛說彼扇提羅等罪報因緣
扇提羅等昔為比丘宿緣罪報文繁不載甚大憂懼即各頭面禮
佛白言世尊今聞說此扇提羅等甚懷怖懼
所以者何和尚舍利弗大智福德國中供養
最上甘珍雙七小兒愚癡無有福德食人如是妙
好飲食後世當受苦果如扇提羅是故我等
實懷憂慮願佛垂哀賜聽我屬捨道還家冀
免罪咎爾時世尊告羅睺羅汝今畏罪還家
求離苦者是事不然何以故譬如二人乏食
飢餓忽遇主人為設種種肥濃美味其人飢
餓貪食過飽然此二人一者有智一者愚癡
有智之人自知食過身體沉重頻伸欠吐即
詣明醫請除苦患良醫即賜摩檀提藥令其
服之吐宿食已令近暖火禁節消息得免禍

患終保年壽其無智者不知食過謂是鬼魅
殺生祠祭欲求濟命腹中宿食遂成生風絞
切心痛因是死亡生地獄中佛告羅睺羅汝
畏罪還家如彼無智愚癡人也汝先有善根
因緣遭值我時如彼明賢能濟苦患而得不
死汝今何為捨明入闇羅睺羅白言世尊諸佛
智慧猶如大海羅睺等心猶如毫末豈能受
持如來智慧佛告羅睺如天雨滴後不及前
雖不相及能滿大器修學智慧亦復如是從
小微起終成大器如是展轉滿無量器是則
自利利人名為大士如我今也羅睺羅等聞
佛說已心開意解普耀經云佛還入宮坐於
殿上俱夷勢羅雲來稽首佛足瞻對問訊時
王僚屬皆懷沉疑太子捐國卜有二年何從
生子佛語父王告諸羣僚俱夷守節貞潔清

壁七

五

無瑕疵設王不信今當現證於時世尊化諸
衆僧皆使如佛羅云年始七歲俱夷即以指
印信環與羅睺言是汝父者以此與馬羅云
應時直前詣佛以印信環而授世尊王及羣
臣咸皆欣踊稱言善哉真佛子也佛語父王
及諸臣曰從今已後無復懷疑此吾之子緣
吾化生勿欲俱夷王得道證俱夷持戒淨修
梵行彌沙塞律云佛往到淨飯王宮時羅睺
羅毋將羅睺羅在高樓上遙見佛來語言汝
見彼沙門不答言見又語言彼是汝父可往
索父餘財佛既入宮於中庭露地坐羅睺羅
馳下趣佛頭面禮足住佛影中白言是影甚
樂願佛與我父餘財佛言汝審欲得不答言
欲得佛便將還告舍利弗汝可度之舍利弗
即度出家為受沙彌戒時淨飯王聞已度羅

睽羅便大懊惱出詣佛所自言佛昔出家尚有難陀不能令我如今懊惱難陀已復出家餘情所寄唯在此子今當出家家國大計永爲斷絕子孫之愛徹過骨髓如何比丘輒度他子願佛從今勅諸比丘父母不聽不得爲道佛卽爲王說諸法竟集諸比丘立制父母不聽不得出家受戒祐尋此律所說羅睽羅出家緣與未曾有經事緣大異者由於爾時對情不同故復兩存焉祐尋釋族爲盛雲布赤澤雖法俗或殊而獲道斯同難陀棄榮欲以從道羅云捨輪王位而襲法梅檀圍繞龍象成羣靡親靡疎隨應而度調御之美於茲可見

釋迦姨母大愛道出家緣記第十四

出中本起經

壁七

六

佛還迦維羅衛國大愛道瞿曇彌稽首作禮

白佛言我聞女人精進可得沙門四道願得受佛法律我以居家有信欲出家爲道佛言且止無樂以女人入我法律服法衣者當不盡壽清淨究暢梵行瞿曇彌則復求哀如是至三佛不聽許作禮而退佛於後時更遊迦維羅衛瞿曇彌如前求出家佛亦不許佛又與諸比丘留止是國避雨三月竟出國而去大愛道與諸老母等俱行追佛頓止河上大愛道便前作禮復求出家佛言止止如前不許便前作禮繞佛而退住於門外被弊敗衣徒跣而立顏面垢穢衣服塵汙歔歔而啼阿難見之卽問何以如是答言今我以女人故不得出家自悲傷耳阿難言止止且自寬意待我白佛阿難卽入稽首白言我從佛聞女人精進可得四道今大愛道以至心欲受法

律願佛聽之佛言止止無樂欲使女人入我法律為沙門也所以者何譬如人家生子多女少男當知是家以為衰弱若聽女人出家乃令佛法清淨梵行不得久住譬如稻田莠雜禾稼則令善穀復敗若使女人入我法律必令清淨大道不久興盛阿難復言大愛道多有善意佛初生時乃自育養至于長大佛言如是大愛道信多善意於我有恩今我成佛於大愛道亦多有恩大愛道但由我故得歸依三寶不疑四諦立信五根受持五戒如是阿難正使有人終身相給衣被飲食卧具病困醫藥不及我此恩德也佛告阿難假使女人欲作沙門者八敬之法不得踰越當盡壽學行之譬如防水善治堤塘勿令漏失其能如是可入律法阿難諦受作禮而出報大

愛道言瞿曇彌何忽憂愁即為再說佛之言教若能如是可得出家大愛道即歡喜而言唯諾阿難聽我一言譬如四姓家女沐浴塗香好衣莊嚴而人復以好華香珍寶為步搖持與其女豈不愛樂頭首受之今佛所教勅八敬法者我亦歡心願以首頂受之爾時大愛道便得出家尋受大戒為比丘尼奉行法律遂得應真後於異時大愛道與諸長老尼俱詣阿難所自言諸長老尼皆久修梵行且已見諦云何當使禮幼少比丘阿難言且停我今當問佛阿難即往白佛佛言止止當慎此言勿得說也且汝所知不如我知若使女人不出家者外道異學一切賢者當以四事種種供養解髮布地請令蹈之如事日月如事天神我之正法當千歲興盛以度女人故

至五百歲而漸衰微所以者何女人有五處不能得作何謂為五一不得作如來二不得作轉輪聖王三不得作第二忉利天王四不得作第六天魔王五不得作第七梵天王大愛道等聞已歡喜奉行

壁七

八

彌沙塞律云大愛道出家受行八敬事事悉同大愛道因阿難問佛大愛道受八敬即得具足戒不知諸釋女五百人云何佛言將往大僧中十衆大愛道作和尚羯磨與受具足三人一受不得四人大方便經云天魔波旬及諸長夜惡邪見人毀佛法僧是故如來不聽女人樂入佛法佛姨母憍曇彌三請不聽憂悲苦惱阿難爲請過去諸佛具四部衆而如來獨不具耶佛告阿難若憍曇彌發大精進修八敬法聽入佛法憍曇彌心大歡喜佛

言未來世中若有比丘尼及諸善女人常當志心念阿難恩稱名供養阿難以大威神應聲護助祐仰惟三世諸佛四部咸備而憍曇彌祈法亟於拒塞者豈非女人障厚方爲道蠱故切磋掇擊以勵將來也

釋迦父淨飯王泥洹記第十五

出淨飯王泥洹經

舍夷國王名曰淨飯治以正法化德仁義常行慈心時被重病身中四大同時俱作殘害其體肢節欲解喘息不定如駛水流輔相宣令國中明醫皆悉來會種種療治無能愈者時王煩惱轉側不停如少水魚夫人姝女見王如是益更愁惱時白飯王斛飯王大稱王等及諸羣臣同發聲言今王設崩永失覆護國將虛弱王身戰動唇口乾燥語聲斷絕眩目淚下時諸王等長跪叉手同共白言大王

壁七

九

素性不好作惡經彈指頃種德無厭護養人
民莫不得安名聞十方大王今日何故愁惱
時淨飯王語聲趣出告諸王曰我命雖斷不
以爲苦但恨不見我子悉達又恨不見次子
難陀以除貪婬世間諸欲復恨不見斛飯王
子阿難陀者持佛法藏一言不失又恨不見
孫子羅云年雖幼稚神足純備戒行無缺吾
設得見是諸子等我病雖篤未離生死不以
爲苦諸在王邊聞如是語悉苦啼泣淚下如
雨時白飯王言我聞世尊在王舍城耆闍崛
山中去此懸遠五十由旬王今轉羸設遣使
者道路懸邈遲晚無益唯願大王莫大愁悵
懸念諸子時淨飯王聞是語已垂淚而言答
白飯王我子等輩雖復遠遠意望不斷所以
者何我子成佛以大慈悲恒以神通天眼徹

視天耳徹聽救接衆生應可度者如有百千
萬億衆生爲水所溺以慈愍心爲作船筏而
度脫之終不疲勞若我今日望見世尊亦復
如是所以然者世尊晝夜常以三昧恒以天
眼觀於衆生應受化者以慈愍心如母念子
爾時世尊在靈鷲山天耳遙聞迦維羅衛大
城之中父王悒遲及諸王言即以天眼遙見
父王病卧著牀羸困憔悴命欲向終知父渴
仰欲見諸子爾時世尊告難陀曰父王淨飯
勝世間王是我曹父今得重病我曹應往及
命存在得與相見令王願滿難陀受教長跪
作禮唯然世尊淨飯王者是我曹父能生聖
子利益世間今宜往詣報育養恩阿難人掌
前白佛言淨飯王者是我伯父聽我出家爲
佛弟子是故欲往羅云復前而白佛言世尊

雖是我父棄國求道我蒙祖王育養成就而
得出家是故欲往覲省祖王佛言善哉宜知
是時令王願滿於時世尊即以神足猶如鷹
王踊身虛空忽然而現在維羅衛放大光明
國中人民遙見佛來皆共舉聲涕淚而言設
大王崩舍夷國名必斷滅矣城中人民向佛
啼哭白世尊言大王如是命斷不久唯願如
來宜可時往及共相見國中人民宛轉自撲
哽咽啼哭中有自絕瓔珞者中有取塵土而
自塗者佛見是已諫國人曰無常離別古今
有是汝等諸人當思念之生死為苦唯道是
真於是世尊即以十力四無所畏十八不共
諸佛之法放大光明更復重以三十二相八
十種好放大光明以從無量阿僧祇劫所作
功德放大光明其光照曜內外通達周徧國

壁七

十一

界光照王身患得安息王遂怪言是何光耶
為是日月之光明耶諸天光乎來觸我身如
天栴檀令我身中患苦得息脫是我子悉達
來也先現光明是其常瑞時大稱王從外入
宮白大王言世尊已來將諸弟子阿難羅云
等乘空來至王宜歡喜捨愁毒心王聞佛來
敬意踊躍不覺起坐須臾之頃佛便入宮王
見佛到遙舉兩手接足而言唯願如來手觸
我身令我得安為病所困如壓麻油痛不可
忍我命將斷寧可還返我今最後得見世尊
痛恨即除佛知父王病重羸瘦色變難識告
難陀言觀王本時形體巍巍顏色端正名聲
遠聞今得重病乃不可識端正形容勇健之
名今何所在時淨飯王一心合掌讚歎世尊
德佛言唯願父王莫復愁悒所以然者道德

純備無有缺減佛出金色臂掌如蓮華光尋
即以手著父王額上王是清淨戒行之人心
垢已離今應歡喜不宜憂惱當諦思念諸經
法義物不牢固得堅固志以種善根是故大
王宜當歡喜命雖欲終自可寬意時大稱王
以恭敬心白淨飯王言佛是王子神力具足
無與等者次于難陀亦是王子已度生死諸
欲之海四道無礙斛飯王子阿難陀者已服
法味佛所說法猶若淵海一句不忘悉總持
之王孫羅云道德純備逮諸禪定成四道果
是四子等已壞魔網時淨飯王聞是語已歡
喜踊躍不能自勝即以自手捉於佛手著其
心上王於卧處合掌心禮世尊足下時佛手
掌放在王心上無常對至命盡氣絕忽就後
世於是諸釋號咷啼哭舉身自撲兩手拍地

壁七

十二

解髻亂髮同發聲言永失覆蓋王中尊王今
以崩背國失威神時諸釋子以衆香汁洗浴
王身纏以劫貝白氎及諸繒帛而以棺斂於
師子座七寶莊校真珠羅網垂繞其傍舉棺
置於師子座上散華燒香佛共難陀在喪頭
前肅恭而立時阿難羅云住在喪足難陀長
跪白佛父王養我願聽我擔伯父棺羅云復
陀長跪白佛言唯願聽我擔祖王棺爾時世尊
前而白佛言唯願聽我擔祖王棺爾時世尊
念當來世人皆兇暴不報父母育養之恩爲
是當來不孝衆生設化法故如來躬欲擔於
父王之棺即時三千大千世界六種震動一
切衆山巔峩涌沒如水上船爾時欲界一切
諸天與無數百千眷屬俱來赴喪北方天王
毗沙門王將諸夜叉鬼神之等億百千衆俱

來赴喪東方天王提頭顱吒將諸妓樂鬼神
之等億百千衆俱來赴喪南方天王毗樓勒
又將鳩槃荼鬼神等億百千衆俱來赴喪
西方天王毗留博又將諸龍神億百千衆俱
來赴喪皆共發哀舉聲啼哭時四天王竊共
思議瞻望佛爲當來世諸不孝父母者故以
大慈悲親欲自身擔父王棺時四天王俱共
長跪同時發聲俱白佛言我等是佛弟子從
佛聞法成須陀洹以是之故我曹宜擔父王
之棺佛聽四天王擔父王棺四天王各自變
身如人形像以手擎棺擔著肩上舉國人民
一切大小莫不啼泣爾時世尊威光益顯猶
萬日並現如來躬自手執香爐在前行出詣
於墓所靈鷲山上有千阿羅漢以神足力乘
虛而至稽首佛足復白佛言唯願佛勅使作

註七

十二

何事時佛便告諸羅漢等汝等疾往大海渚
上取牛頭栴檀種種香木即受教勅如彈指
頃各到大海共取香薪屈伸臂頃便已來到
佛與大衆共積香薪舉棺置上以火焚之一
切大衆見火熾然皆向佛前死轉自撲益更
悲哭有得道者皆自慶幸未獲道者心戰惶
怖毛衣爲豎佛告四衆曰世間無常苦空非
身無有堅固如幻如化如熱時燄如水中月
命不久居汝等諸人但見此火便以爲熱諸
欲之火恒復過此是故汝等當自勸勉求離
生死乃得大安時火燄熾燒王身已爾時諸
王各各皆持五百餅乳以用滅火火滅之後
競共收骨盛置金函即於其上便共起塔懸
繒幡蓋供養塔廟時諸大衆同時發聲俱白
佛言大淨飯王今已命終神生何所唯願世

尊分別解說於時佛告眾會曰父王淨飯是清淨人生淨居天祐觀無常之變甚矣固有形之類而莫免也夫以天尊侍疾而不能延齡金掌在心而無救理報盡數終無常對至是以聖人修長壽之果而不養蕉沫之身也

釋迦母摩訶摩耶夫人記第十六

註七 十四 出佛昇切 利天為母

佛在忉利天歡喜園中波利質多羅樹下三月安居爾時如來四眾圍繞身毛孔中放千光明普照三千大千世界一一光中有千葉蓮華一一華中皆有化佛威光照曜不可譬類諸天子等不知何緣而有此事佛告文殊汝詣母所道我在此願母暫屈禮敬三寶文殊即往宣白摩耶摩耶聞已乳自流出而作此言若審我所生悉達多者當令乳汁直至

於口作此語已兩乳湮出猶白蓮華而便入於如來口中時摩耶見已踊躍怡悅如華開榮大千世界普皆震動諸妙華果非時敷熟即語文殊我從與佛為母子來歡喜安樂未曾如今日也即與文殊俱趣佛所世尊遙見

母來如須彌山鼓動之相便以梵音而白母

言身所經處與苦樂俱當修涅槃永離苦樂摩耶一心五體投地專精正念結使消伏佛為說法摩耶聞已即識宿命善根純熟破八十億熾然之結得須陀洹果即白佛言生死

註七

十五

牢獄已證解脫時會大眾聞此語已異口同音而作是言願一切眾皆得解脫爾時世尊於忉利天為眾廣說大利益至三月盡將欲還下命鳩摩羅汝今可下至閻浮提語言如來不久當入涅槃于時眾聞是語已

極大愁惱作如是言我等頃來不知大師所
在今者乃在忉利天上又復不久欲入涅槃
何其苦哉世眼將滅我等罪身天人殊絕無
由昇天恭敬勸請唯願仁者爲宣啓請唯願
愍念閻浮提人時速還下時鳩摩羅還至佛

所具以白佛爾時世尊聞此語已放五色光
明照耀顯赫時天帝釋知佛當下即使鬼神
作三道寶塔中央閻浮檀金左用瑠璃右用
碼瑙欄楯雕鏤極爲嚴麗佛語摩耶生死之
法會必有離我今應下還閻浮提不久亦當
入於涅槃摩耶垂淚說偈爾時世尊與母辭
別下躡寶塔梵天執蓋及四天王侍立左右
四部大衆歌頌讚歎天作妓樂充塞虛空散
華燒香導從來下閻浮提王波斯匿等一切
大衆集在寶塔稽首奉迎佛還祇洹處師子

座四衆圍繞歡喜踊躍

祐敬惟佛生七日母昇忉利三世如來莫不
同然摩耶積因託化誕聖是以旣爲天師而
方味其乳已入泥洹而還起致敬欲報之德
於斯至矣

釋迦姨母大愛道泥洹記第十七

出佛母
泥洹經

王園精舍大愛道比丘尼即佛姨母也將欲
滅度曰吾不忍見世無如來無所著正真道
最上正覺及諸應真滅度吾當先息靈神還
于本無矣佛一切智具照其心即告阿難大
愛道念曰吾不忍見世尊并諸應真等泥洹
十七欲先滅度阿難聞教即稽首言今聞尊命四
體萎墮心塞智索不識四方之名佛告阿難
汝謂大愛道滅度將戒定慧解脫度知見種
四意止乃至八品道行去耶對曰不也但惟

佛生七日太后薨沒慈母至有彌恩在佛所
耳世尊歎曰如汝所言慈母於吾實有哺乳
重恩此恩難報吾已報之我亦有難報之恩
在母所也由我開示歸命三寶苦集盡道眼
明盡諸有結獲無所著若人能悟愚者之惑
令入真正苦集盡道者恩過須彌是故阿難
吾有重恩於大愛道為無量也於時大愛道
與除饑女五百人除饑女即比丘尼也康會
注法鏡經云凡夫貪染六
塵猶餓夫夢飯不知厭足聖人斷
貪除六情饑餓號出家為除饑俱到佛所
皆頭面著佛足禮退叉手立白佛言不忍觀
佛及諸應真滅度欲先泥洹佛默可之大愛
道以手摩佛足曰此晚觀如來最上正覺自
今已後不復觀矣五百除饑陳辭如上佛可
之為說身患滅度之安諸除饑女莫不歡喜
繞佛三匝稽首而去還于精舍布五百座皆

壁七

十七

各就座大愛道現神足德於自座沒從東方
來在虛空中作十八變八方上下亦復如是
放大光明以照諸冥上耀諸天五百除饑變
化俱然同時泥洹佛告阿難汝明旦入城到
耶遊理家所理家即優婆塞受
戒在家故曰理家告之曰佛母
及五百者年除饑皆已滅度佛勸理家作五
百輦牀麻油香華樟栴梓材事各五百真妓
正音當以供養所以者何斯諸除饑皆六通
四達獲空不願無想淨定今得泥洹為佛所
歎一時供養其福無量阿難稽首敬諾平旦
入城至理家門聞阿難來心怖毛豎今來甚
早斯事非恒將以何故阿難如教具為宣說
理家聞之即躡身于地抗哀而云自今惟耶
梨精舍都為空寂王道四街不復觀神通除
饑國道為空其痛何甚乎阿難答曰佛說乾

坤雖久始必有終三界無常如幻如夢生求不死會莫不離者終不可得也理家心解歡喜阿難復至諸梵志理家值集在講堂有異論議即告之曰佛勸諸賢者作五百祭具所以然者佛母五百除饑皆以減度梵志理家聞阿難言靡不躄地死轉哀號阿難又說三界如幻都為非常身為苦器惱痛所聚唯泥洹安故聖歸之理家心解稽首奉辦阿難還至佛所如事以聞梵志理家即備器具馳詣精舍時王園門閉理家使人緣入開門欲入講堂有女沙彌三人一人得不還道次者頰來小者溝港告理家曰吾師坐禪今得寂定慎勿擾動答曰師已滅度非為定耶沙彌聞之躄身絕息有頃乃蘇哀而言曰誰當教誨吾等聖訓絕矣理家觀之莫不哀泣告沙彌

卷七

十八

曰佛本說經恩愛雖會終必有離但當連志力取應真理家聞維畢捧舍利詣佛所佛告阿難汝東向又手下右膝曰有直信直業三神六智道靈已足者來趣斯所以然者佛母及諸除饑女五百人今皆善逝宜當法會四方俱然於是四方各二百五十應真神足飛來稽首佛足佛起至大愛道舍利所千比丘從皆就座佛告阿難取舍利盛之以鉢著吾手中阿難如命以鉢盛舍利長跪授佛佛以兩手受之告諸比丘斯聚舍利本是穢身克愚怒暴嫉妬陰謀敗道壞德今母能拔女人克愚之穢身與丈夫行獲應真道遷靈本無何其健哉告比丘眾及諸理家宜共興廟應修供養僉曰唯然於是四眾天人鬼龍造廟立刹種種供養

摩訶波闍波提齊言大愛道也亦名瞿曇彌 雜阿

舍經云是難陀親母又增一阿舍經云佛告
 阿難難陀羅云汝等舉大愛道身我當親自
 供養爾時釋提桓因毗沙門王等前白佛言
 唯願勿自勞神我等自當供養佛言止所
 以然者父母生子多有所益長養恩重乳哺
 懷抱要當報恩不得不報過去未來諸佛母
 先取滅度諸佛皆自供養耶維舍利也時毗
 沙門天王使諸鬼神往梅檀林取梅檀薪至
 曠野之間佛躬自舉牀一脚羅云舉一脚阿
 難舉一脚難陀舉一脚飛在虛空往至塚間
 其中四部眾舉五百比丘尼舍利俱至塚間
 爾時佛自取梅檀木著大愛道身上佛言有
 四人應起塔供養一者佛二者辟支佛三者
 漏盡羅漢四者轉輪聖王皆以十善化物故
 爾時人民即取舍利各起塔供養祐尋姨母

為德恩均所生是以持舉之重爰酬鞠育所
 以勸報復勵無恩人也
 釋迦種滅宿業緣記第十八出長阿舍經
 爾時波斯匿王新紹王位便作是念我今新
 紹王位先應取釋種家女即告一臣曰往迦
 毗羅衛至釋種家持我名字告彼釋種云波
 斯匿王問訊與居輕利致問無量又語彼釋
 吾欲取釋種女設與我者抱德無已若見違
 者當以力相逼大臣受教往告迦毗羅衛國
 爾時釋種五百人集在一處是時大臣至釋
 種所具宣王言釋種聞已極生瞋恚吾等大
 姓何緣當與婢子結親其眾中或言當與或
 言不可與爾時摩訶男語眾人言諸賢勿共
 瞋恚所以然者波斯匿王為人暴惡或壞我
 國界我今躬自當往與共相見說此事情時

摩訶男家中婢生一女面貌端正世之希有沐浴此女與著好衣戴羽葆車送與波斯匿王又白王言此是我女可共成親時波斯匿王得此女已極懷歡喜即立此女爲第一夫人未經數日而身懷妊後生一男兒端正無雙世之殊特時波斯匿王集諸相師與子立字時相師言大王當知求夫人時諸釋共諍或言不與使彼此流離今當立字名曰流離時彼斯匿王愛此流離太子未曾去前年向八歲王告之曰汝今已大可詣迦毗羅衛學諸射術是時波斯匿王給使諸人乘大白象往詣釋種至摩訶男家而白言曰波斯匿王使我至此學諸射術唯願祖父母事事教授時摩訶男報言欲學術者善可習之是時摩訶男釋種集五百童子使共學術時流離太

壁七

二十

子共學射術爾時迦毗羅衛城中新起一講堂自相謂言今此講堂成來未久畫彩已竟猶如天宮我等先應往請如來於中供養及比丘僧當令我等受福無窮然後我等當入此堂時諸釋種即於堂上敷種種坐具懸繒旛蓋香汁灑地燒衆名香復儲好水然諸明燈是時流離太子往至講堂即昇師子之座時諸釋種見之極懷瞋恚即前捉臂逐出門外各共罵之此婢生物敢入中坐撲之著地是時流離太子即從地起長歎息而視於後是時有梵志子名曰好苦流離太子語好苦梵志子曰此諸釋種捉我毀辱乃至於斯我後紹王位時汝當告我此事是時好苦梵志子報曰如教是時波斯匿王命終便立流離太子爲王時好苦梵志往至王所而作是說

壁七

十一

王當憶本諸釋所毀辱不時流離王報曰我憶本事時流離王興起瞋恚勅諸羣臣汝等速嚴駕集四部兵吾欲往征釋種諸臣即受王教令即雲集四種之兵往至迦毗羅越爾時衆多比丘聞流離王往征釋種具白世尊是時世尊聞此語已即往逆流離王便在一枯樹下無有枝葉於中結加趺坐時流離王遙見世尊即下車禮足在一面立爾時流離王白世尊言更有好樹枝葉繁茂何故在此枯樹下坐世尊告曰親族之蔭故勝外人是時流離王便作是念今日世尊故為親族吾不應往征宜可齊此還歸本土是時好苦梵志復白王曰王當憶本釋種所辱王聞此語已復更集兵復詣迦毗羅越大目捷連聞流離王往征釋種白世尊言今日流離王往攻

釋種我今堪任使流離王及四部兵擲著他方世界世尊告曰汝豈能取釋種宿緣著他方世界乎時目連白佛言實不堪任使宿因緣著他方世界爾時世尊語目連曰汝還就坐目連復白佛言我今堪任移此迦毗羅越著虛空中世尊告曰汝今堪能移釋種宿緣著虛空中乎目連報言世尊我不堪任佛告目連汝今還就本位目連復白佛言唯願聽許能以鐵籠覆迦毗羅越城上世尊告曰云何目連能以鐵籠覆釋種宿緣乎目連白佛不也世尊佛告目連釋種今日宿緣已熟今當受報是時流離王往詣迦毗羅越時諸釋種集四部之衆一由旬中往逆流離王是時諸釋一由旬內遙射流離王或射耳孔不傷其耳或射頭髻不傷其頭或射弓絃不害其

人或射鎧器不傷其人或射牀座不害其人
或射車壞輪不害其人或壞幢麾不害其人
是時流離王見此事已便懷恐怖告羣臣曰
汝等觀此箭爲從何來羣臣報曰此諸釋種
去此一由旬中射箭使來流離王報言彼設
發心欲害我者並當死盡宜可於中還歸舍
衛是時好苦梵志前白王言大王勿懼此諸
釋種皆共持戒蟲尚不害況害人乎今宜前
進必壞釋種是時流離王漸漸前進向彼釋
種是時諸釋退入城中時流離王在城外住
而告之曰汝等速開城門若不爾者盡當殺
汝時迦毗羅越城有釋童子年向十五名曰
奢摩聞流離王今在城外即著鎧持仗往至
城上獨與流離王共鬪是時奢摩童子多殺
害人衆各各馳散並作是說此是何人爲是

三七

三三

天耶爲是鬼神耶遙見如似小兒是時流離
王便懷恐怖即入地孔避之時釋種等聞壞
流離王衆是時諸釋即呼奢摩童子而告之
曰汝年幼小何故辱我等門戶豈不知諸釋
修行善法乎我等尚不能害一蟲蟻命況復
人耶我等亦能壞此軍衆一人敵萬人然我
等復作是念殺害人命死入地獄若生人中
壽命極短汝速出去不須住此是時奢摩童
子即出國去是時流離王復至門中速開城
門不須稽留是時諸釋自相謂言可與開門
爲不可乎爾時弊魔波旬作一釋形告諸釋
言汝等速開城門勿共受困是時諸釋即開
城門時流離王告羣臣曰今此釋衆人民極
多非刀劍所能害盡悉取埋脚地中然後使
暴象踏殺爾時羣臣受王教勅即以象踏殺

之時流離王勅羣臣曰汝等速選面手釋女取五百人時諸臣等受王教令即選五百端正女人將詣王所是時摩訶男釋至流離王所而作是說當從我願流離王言欲何等願摩訶男曰我今沒在水底隨我遲疾使諸釋種並得逃走若我出水隨意殺之流離王曰此事大佳是時摩訶男釋即入水底以頭髮繫樹根而取命終是時城中諸釋從東門出復從南門入或從南門出還北門入是時流離王告羣臣曰摩訶男父何故隱在水中如今不出爾時諸臣聞王教令即入水中出之摩訶男已取命終爾時流離王以見摩訶男命終王方生悔心我今祖父已取命終皆由愛親族故設當知者終不來攻伐此釋種是時流離王殺九千九百九十萬人流血成河

壁七

二十四

繞迦毗羅衛城往詣尼拘留園中是時流離王語五百釋女言汝等慎莫愁憂我是汝夫汝是我婦要當相接時流離王捉一釋女而欲弄之時女曰大王欲何所為時王報言欲與汝情通女曰我今何故與婢生種情通是時流離王甚懷瞋恚勅羣臣曰速取此女則其手足著深坑中諸臣受教則其手足擲著坑中及五百女人皆罵王言誰持此身與婢生種共交通耶時王瞋恚盡取五百釋女則其手足著深坑中是流離王壞迦毗羅越已還詣舍衛城爾時祇陀太子在深宮中與諸妓女共相娛樂王聞作妓聲即勅御者汝迴此象詣太子所是時守門人遙見王來而白王言王小徐行祇陀太子今在官中自娛勿相觸嬈是時流離王即時拔劍取守門人殺

之祇陀王子聞流離王在門外便出與王相見善來大王可入小停駕時流離王報言豈不知吾與諸釋共鬪乎祇陀對曰聞之流離王報言汝今何故與妓女遊戲而不佐我耶祇陀報言我不堪任殺害衆生是時流離王極懷瞋恚即復拔劍斫殺祇陀爾時世尊以天眼觀祇陀王子以取命終生三十三天是時五百釋女自歸稱喚如來名號如來於此生亦從此間出家學道而後成佛今受此毒痛極苦世尊何故而不見憶爾時世尊以天耳清徹聞諸釋女稱怨向佛將諸比丘徃至迦毗羅越時五百釋女遙見世尊將諸比丘來到其邊皆懷慚愧爾時世尊語釋提桓因言此諸釋女皆懷慚愧釋提桓因即以天衣覆諸女上爾時世尊而語毗沙門王言此諸

壁七

二十五

女人飢渴日久毗沙門王即辦自然天食與諸釋女皆自充足世尊漸與諸女說微妙法苦集盡道盡與說之爾時諸女塵垢即盡得法眼淨各於其所而取命終皆生天上爾時世尊詣城東門見城中烟火洞然爾時世尊徃詣尼拘留園中坐告諸比丘我昔在中與諸比丘說法如今空虛無有人民自今已後如來皆更不復至此從座起去徃舍衛祇樹給孤獨園告諸比丘今流離王及此兵衆却後七日盡當磨滅是時流離王聞世尊記聞已恐怖告羣臣曰如來今記却後七日我及兵衆盡當滅沒汝等可觀外境無有盜賊水火災變來侵國者何以故知佛如來語言無有二爾時好苦梵志尋白王言大王勿生恐懼今外境無難亦無災變今日大王快自娛

樂流離王言梵志當知佛言無異時流離王使人數日至七日頭王大歡喜踊躍不能自勝將諸兵衆及諸姝女往阿脂羅河側而自娛樂即於彼處卒大雷震非時雲起暴風疾雨時流離土及諸兵衆爲水所漂皆悉消滅

壁七

二十六

身壞命終入阿鼻地獄復有天火燒城內宮殿爾時世尊以天眼觀見流離王及四兵衆悉皆命終入地獄中爾時比丘白世尊言流離王及四部兵今已命終爲生何處世尊告曰流離王者今入阿鼻獄中諸比丘白言今此諸釋昔日作何因緣今爲流離王所害爾時世尊告諸比丘昔日之時此羅閱城中有捕魚村時世飢儉人食草根一升金買一升米彼村中有大池水又復饒魚時羅閱城中人民之類往至池中捕魚食之當於爾時水

中有二種魚一名拘瓊二名多舌是時二魚各相謂言我等於此衆中先無過失我是水性之蟲不處乾地此人民之類皆來食噉我等設前世時少有福德者其當報怨爾時村中有一小兒年向八歲亦不捕魚復非害命然復收魚在於岸上小兒見已極懷歡喜比丘當知爾時羅閱城中人民之類豈異人乎今釋種是也時拘瓊魚者今流離王是兩舌魚者今好苦梵志是小兒見魚笑者今我身是爾時釋種坐取魚食無數劫中受地獄苦今受此對我爾時坐見而笑之今患頭痛如似石壓猶如以頭戴須彌山所以然者如來更不受形已捨衆行度諸厄難是諸比丘由此因緣今受此報

釋迦畢罪經與此大同小異云流離王滅諸

釋種旋師罷軍遣使者致敬於佛佛視使者
答言王自受矣阿難整法服稽首白言佛不
虛視其必有緣衆祐曰釋罪畢矣却後七日
太山鬼神以火逼王及其臣民王罪難救如
釋禍難禳也王行湖邊軍衆入水浴神化爲
毒蟲螫其王衆毒行身腫或於水中死者或
百步一里死者垂半入國兇鬼雲集宮中夜
魅鳴聚居宮相待日月薄蝕星宿失度怪異
首尾王聞佛戒災變之異內如湯灼會臣議
論或言投山者或言投川者王遂乘船入海
強富者得從貧羸者留國王內宮人解衣脫
陽燧珠著船服上其日雲興竿絕舟漂臣民
僉曰弊王行兇乃致斯禍向中之時日出灸
陽燧出火始燒王舟投水即沒雷震霹靂即
入太山地獄留在岸上者微怖而全法句譬

經云佛弟子名曰目連見流離王伐舍夷國
以報宿怨當殺四輩弟子念甚可憐便到佛
所白言流離王征舍夷國我欲以四方便救
舍夷國人一者舉舍夷國人著虛空中二者
舉舍夷國中人著海中三者舉舍夷國人著
兩鐵圍山間四者舉舍夷國人著他方大國
中央令流離王不知其處佛告目連雖知汝
有是智德能安處舍夷國人眾有七不可
避何謂爲七一者生一者老三者病四者死
五者罪六者福七者因緣此七事意雖欲避
不得自在如汝威神可得作此四宿對罪負
不可得離於是目連禮佛便去猶意不已即
取舍夷國人知識檀越四五百人感著鉢中
舉著虛空星宿之際流離王伐舍夷國殺三
億人已引軍還國於是目連往到佛所爲佛

